

敬

事

草

啟事草卷十五目錄

祈天永命等事宜揭帖

請沈朱二公誥命揭帖

推冢宰乞免點趙司寇并薦曾公揭帖

請御殿宣勅宣捷揭帖

催大察本揭帖

再催大察本揭帖

催沈朱二公自陳本揭帖

查會試主考例揭帖

言主考宜用三輔揭帖

再請主考并預言周少宰不可用揭帖

催散館科道揭帖

催科道拾遺本揭帖

請准各差御史辭朝揭帖

請通仕路揭帖

請給各差御史勘合揭帖

東宮講讀請期揭帖

回催清查草場勒書揭帖三通

調停楊駢馬揭帖二通

催補科道揭帖

天變自効疏

因傳免東宮講讀報入直揭帖

請留錢夢臯例陞揭帖

催山陰王相公卹典揭帖

不增皦生光罪名揭帖

妖書逆犯正法恭慰揭帖

催播州皮林敘功本揭帖

請允差遣御史揭帖

催急選揀選本揭帖

請點宣府巡撫并總督倉場揭帖

差遣御史領勅揭帖

催三鎮巡撫及倉場揭帖

請陞選郎揭帖

再催倉場巡撫揭帖

祖陵雷火揭帖

發天下補官本揭帖

請發 御前章奏揭帖

辭楚黔皮林加恩疏

再辭皮林敘并推敘撻功疏

催二省按差揭帖

回 聖諭揭帖

回 聖諭揭帖

弭灾實政揭帖

選館揭帖

回 聖諭揭帖

催補官揭帖

再催二省按差揭帖

再催揀選急選本揭帖

回 聖諭揭帖

回 聖諭揭帖

敬事草卷十五

柱國少傅兼太子太傅吏部尚書中極殿大學士臣沈一貫

祈天永命保國安民事宜揭帖

三臣謹題歲前十一月十五日伏蒙 皇上手

札時逢陽長遭遇 聖母萬壽節卿等條具祈

天永命保國安民事宜詳擇施行欽此臣等奉
命不勝踴躍當即草具短章而因捕奸方急未
遑進御迨今三陽啟泰萬國來朝正觀聽一新
之會恭逢 皇上三十二年久道化成之日又

恭迎 聖母六袞周甲齊天伊邇之辰仁人事
天當為 祖宗延萬萬年無疆之祚孝子愛日
當為 聖母告萬萬歲無疆之福福由心造機
不在遠祚以德延事不容後 皇上于歲前尚
以陽長之慶壽筵之歡興此念其在今日更當
萬倍留意此臣等所以百拜稽首而凝望者也
臣等復思修政與捕奸本同一事政若克修奸
自得獲惟此輩輕諒朝廷藐視法紀由來有漸
以致于斯元氣充實百邪自消故捕奸其小者

也修政其大者也如頃者 皇上因此一事而
大闢天性慰諭 東宮慈極之心益愉國本之
謨益固宮庭尤加雍穆朝署尤加肅清則以一
至拂意事而昭警戒震動之誠發俊偉光明之
業天下有誦萬世有傳所得更多夫王道莫大
于明倫建極啟後垂昆次則肅紀振綱施仁布
德而其要機惟在于分職授任進賢黜不肖一
加之意耳蓋聞治天下之道第有經常書曰與
治同道罔不興與亂同事罔不亡夫治何以言

道而亂何以言事傳自先王之謂道創自己之謂事以法御情之謂道以情立法之謂事道與事不同治與亂頓異道無弊而事有弊道可久而事不可久也今之時政詭于舊章成憲者多矣而莫甚于礦稅萬民苦之百僚爭之即上亦自知其不便而每托于權宜以示仁愛之心此非祈天永命保國安民之術亦既昭昭矣何不曠然發一德音盡罷止之出民于水火之中措之衽席之上大聖人作為舉念即是何難

之有而乃久于此也其他所謂肅紀振綱施仁
布德雖遽數之不能終物畧舉其大莫急于拯
災民室盜源疏法網釋父繫罷宣索寬商困緩
工作急河役凡在諸臣屢有補牘亦 祖宗累
朝之典物 皇上初御之常事如日用飲食至
無難者惟 聖見過于高明而遺于中庸故視
祖宗以為不足法人言以為不足恤而不知以
古之道揆今之事大不符合使天下有理外之
事可耳如果無理外之事也何可不寒心哉臣

等指事救失日亦不足竊謂惟得賢人而布列
有位則可興道致治扶危定傾故補官授任愛
惜人才進賢退不肖尤急務也蓋天下無一人
獨運之理亦非寥寥數人所能支持一祖宗因
事設官為官求人以人任官以官舉事交相為
用始得其濟今禮兵尚書久缺吏部近又缺六
部侍郎止四五人南京部院尤缺巡撫特遣重
任也而河南久缺科道官向無滿三考者今踰
九載而不遷起補選補考補多未下郎曹日壅

方面半虛官不得人或閼署而皆空人滯于官
或十年而不調壯夫懷銷繭之憂白首起蹉跎
之嘆至于批鱗齒馬放逐逮繫之臣既從淪棄
一斤不還三木囊頭經年長繫怒畢世而未解
恩屢布而未霑必世後仁之日勝殘去殺尚耻
言之何可令有向隅獨泣之夫也自昔人主誰
不願得忠義之臣而用之夫忠義雖出于天性
而感激實生于主恩故曰體群臣則士之報禮
重人臣出身事主為升斗祿耳予之則頌聲四

起抑之則怨讐並作人主自為聲名計宜必樂其頌不樂其怨頌聲起則精神奮而事舉怨讐作則心志睽而事廢人主自為政事計宜必樂其舉不樂其廢故使人咸遂其欲者人主所以自遂其欲也使人咸快其情者人主所以自快其情也我 聖祖立國置文武官若干員與天下賢才共之 聖祖豈輕予人官者哉廣順人情而後可總集吾事也當是時訪山搜澤而著之律令有寢中士夫不為君用之罪豈有輜輶

待除顧棄之乎如謂今之人多為身謀少為國謀無可以信任者獨不念雲龍風虎勢本相湏取人以身氣類自合未有有是君無是臣之世也國士之報逾于衆人感遇徇知人之常性未有厚其施不厚其報者如謂今之人拜官公朝謝恩私門宜斬之而渙其群不宜聽之而成其黨斬之恩益歸于下聽之恩乃出于上也至于藩棄之臣縲紲之士身負創痏孰不求生日月在天誰甘永絕抵牾可原懲創可念許以自新

安可妄斬此一恩也夫人才之在天下猶卉木
之在山林愛惜之儲養之始得其用棄置之踐
踏之立見其盡今一舉事即憂乏才亦因上之
人無愛惜之心儲養之道耳唐臣陸贊有言曰
太慎廢官太精失士望得彌失務精益粗鑒賞
獨任于聖聰披擇頗難于公舉遂使先進者益
凋後來者難接古者求才貴廣考課貴精課責
之嚴進退之決不肖者旋黜才能者驟升非但
人得薦士亦得自薦其才所薦必行所舉必試

原
缺

諭旨四道隨進惟

聖明裁擇施行

三十二年正月初十

上日

諭吏部朕思致治之道全資用人祖宗設一官必
有一官職掌原無虛濫但今各官薦舉論列多憑
已私大臣會推亦多徇情市恩苟且塞責屢命再
推未見真實堪用之人故久未點發趙世卿雖暫
攝部事然素懷公明藻鑑朕信任方殷可借爾僚
屬將屢次會推兩京大僚通行評品更定前後次
序開寫來看但求真才勿論官次有不堪的不妨

高宗憲皇帝
卷一百一十五
刪去朕當精閱點用今大察之後天下員缺數多
也都作速推來務要如前精舉其欽降罷閑人才
有可用的懲創已久難以終棄但其間賢愚忠奸
天淵不等卿等可嚴加旌別將真堪及時起用之
人先舉十餘員來看毋得徇私冒濫孤朕特任之
意如諭遵行

諭戶工二部朕以大工浩繁財力不繼暫行礦稅
實出權宜今兩宮業已告成三殿次第可舉朝夕
軫念四方不忍重為民困方今春和布德一切礦

稅着盡行罷止咸與休息差去四官文到之日便
馳驛還京司房原奏人等俱着撤去不許仍留地
方致貽後患其錢糧已徵在官者照數解京毋許
侵匿未徵者都與蠲免因而作弊者查出治罪不
饒如諭遵行

諭戶工二部朕以大工肇興錢糧詘乏暫行礦稅
免累小民本是權宜實存德意然利之所在弊實
叢興訪得各差內官多信聽參隨等人雜以奸棍
恣行侵暴害民激變利歸群小怨歸朝廷殊可痛

恨本宜一切停止但今兩宮雖已告成三殿尚在
經始難以盡停姑着差去內官暫住地方聽撫按
官督令有司照歲額包徵送內監轉解安靜行事
候旨停罷其司房原奏及委官人等悉行撤回不
許容留地方違者撫按官叅奏治罪如諭遵行
諭刑部自礦稅事起各處官員人等多有觸犯違
誤以致叅拏到京懲創有年情可矜憫今三陽啟
泰萬物咸亨卿等可將鎮撫司及爾部見監的開
具奏來以憑釋放昭朕好生之德如諭奉行

未發上

原缺

推冢宰乞免點趙司寇并薦曾公摺帖

題今日在廷續推堪任吏部尚書官四員內有
南京刑部尚書趙參魯臣惟參魯乃臣同鄉今
吏部右侍郎周應賓亦臣同鄉臣待罪首揆而
有兩同鄉居首部誰肯信臣無私者即點用由
于至尊而臣不早求免點安可謂非私也參
魯才品誠堪大用但用之他部皆可而必于吏
部不可不但妨臣亦妨參魯彼因臣在必不可
至臣因妨彼又不自安勢必兩相避而兩相求

去也惟望皇上免點參魯幸甚臣歲前手具一揭薦南京吏部尚書魯同亨堪任此官原任大學士王家屏堪攝此官臣一念樸忠諒蒙

昭鑒但念人才難得人命難知頃道路之言已有傳家屏不幸者殊可駭嘆可見老成當愛惜進用宜及時矣吏部尚書總攝百僚必一時極選始有弘濟如魯同亨今人無出其右若蒙簡用最稱得人苟虛一言神明誅殛惟皇上

採納

正月十日

請御殿宣勅捷揭帖

三臣謹題該刑部等衙門一本為糾劾事擬二
十三日請 皇上御文華殿舉大班糾劾之典
又欽天監一本為捷音事擬二十六日請 皇
上御文華殿宣蕩平播逆之捷臣等竊惟 皇
上延見來朝官員面宣訓勅自萬曆二十三年
後未嘗有舉平定播州御樓受俘乃萬曆二十一
八年事至今未經宣捷敘賞茲以玉帛會同之
朝而有干戈輯寧之慶兩大典禮一時遇合修

明久曠之儀復還觀聽之舊凡在臣工有同覩
望聖躬至重固當慎加節調而聖政日新
實亦助增燕喜使朝儀不至久廢鉅典不為虛
文振精神新耳目起廟堂之廢墜而厲海宇之
玩愒是在清蹕一惠臨也如以數御為煩或將
二事併于一日亦甚簡易乞令所司具儀舉行
臣等慙惄下懷惟望吏治肅清武功寧謐共嚴
威顏于咫尺咸承休德于下風無任跂

正月十八日上
十二奉

聖旨朕覽卿等奏揭具見仰體忠愛但文華殿窄
小行禮未便卿等傳示照先年免朝例行

催大察本揭帖

三臣題今月自初二日至十二日吏部會同都察院考察天下官員竭晝夜之群力合朝野之公心既以三本具題伏蒙發閣票擬矣連日未見批示蓋皇上留神吏治精勤披閱之故然具瞻明命者若望雲霓不能頃刻安也伏乞早賜允發幸甚謹題候

旨正月二十八日上奉

聖旨考察天下官員朝廷大典朕因即日恭待聖母文書未得悉覽今卿等奏已知道了

原缺

催沈朱二公自陳本揭帖

題二十一日該同官臣鯉一本為奉運方新輔
職久曠懇乞天恩亟賜罷免以清政本事臣
齎一本為竊祿無功引年及格懇乞聖恩准
容退休以安分誼事俱蒙發臣票擬已經擬進
今待命四日未奉俞旨臣惟二臣皆一時賢
輔足任股肱而臣以一身直閣正當新政始布
之時幾務繁冗之日莫謀莫斷望助更切伏乞
將前二本早賜允發促令即出贊理國事幸甚

臣愚幸甚正月二十五日上

查會試主考例揭帖

臣謹題今日文書官王體乾捧出次輔沈鯉再辭典試本口傳 聖諭這本說的是着出旨來查二十九年主考是誰欽此臣惟會試主考舊規例用次輔遵行久矣若次輔曾經用過則用三輔又若輔臣俱經用過無可復用則用翰林官之最深者此定例也今歲例該臣鯉典試而再三辭免臣不敢違例仍以鯉上請今鯉既再疏固辭奉有 諭旨敢不遵票但未奉免不允

明示何敢擅擬而二十九年一科之例亦恐未盡謹查三科事例進覽惟 聖明裁示

二十三年乙未科趙志臯為首輔用次輔張位主考

二十六年戊戌科趙志臯為首輔次輔張位已經主考臣一貫備員三輔蒙遣主考

二十九年辛丑科趙志臯為首輔臣一貫已經主考閣中並無別員用吏部右侍郎馮琦

主考

言主考宜用三輔揭帖

題會試主考官臣已經題請而次輔苦辭昨蒙
皇上垂問臣又歷舉往年故事以聞伏乞早賜
裁示以便遵行此係國家重典次輔原不宜辭
若允其辭宜用三輔為當儻不任大臣而任群
臣使人人開避事之端以後誰敢為國家擔任
惟 皇上乾斷或用次輔或用三輔與副考唐
文獻入場供事臣不勝惶惶待命之至二月初四日上

再請主考并預言周少宰不可用揭帖

題臣惟會試主考用次輔鯉乃天然定序名正
言順本不宜辭若允其辭則用三輔廢至為妥
當有如用人不以官為定而務使人不得窺測
則成法盡亂而體統難立心迹不明而煩言更
多矣必欲以不測用人則用禮部侍郎李廷機
本官真才實學資望最深見在掌部而倏使典
試尤為不測以廷機為正而以原推侍郎唐文
獻副之可也又求其次則以唐文獻為正而用

少詹事楊道賓副之亦可也或用少詹事黃汝良副之亦可也臣不敢擅便統惟聖明裁定至千吏部侍郎周應賓臣敢預言其不可蓋應賓資俸在廷機之後乃臣門生又臣鄉人近以其子求臣女為婦而稱姻家昨蒙皇上親擢為吏部臣秋毫無所干預而外人遂有物色臣者亦有不亮臣心謂臣欲令典試者臣安得不因此而亦生戒心乎故謂應賓必不可用皇上且置之也皇上若體亮次輔欲為之明

嫌疑塞弊竇免煩言杜物議乞一視同仁推此
心以體亮臣使臣亦得明嫌疑塞弊竇免煩言

杜物議實如天覆憐之大恩臣不勝哀懇之至
二月初五日上於
是得旨三輔典試

乞歸三疏

奏為積病難痊三懇 慈恩俯容退休以延餘
喘事頃臣具揭具疏兩懇賜骸奉 聖旨朕以
卿偶疾暫假慎攝佇望日出佐理豈宜有此來
奏朕心惻然便着太醫院堂上官率領御醫前
去診視調理卿宜仰體倚任至意稍可即出輔
政勿得遜辭該衙門知道又奉 聖旨卿贊政
多年純誠體國篤慎清貞備極勞勤朕所鑒知
適今海宇多事機務殷繁方切倚毗偶緣微恙

催科道拾遺本揭帖

臣題切照有朝覲則有考察有考察則有拾遺此本朝不易之定規也今歲朝覲考察已畢正月二十六日科道官各具疏拾遺共四本已蒙發閣票擬矣而未經批發至二月初三日科道官仍寫前疏進催亦未蒙發彼被論官員雖止十數人而關係勸懲之事不小不下部院議覆何以定其去留臣是用跼蹐敢乞檢發或令該部院據揭題覆以飭國紀以振吏治

二月十四日上

請准各差御史辭朝揭帖

三臣題御史之設原欲其巡行郡國不欲其空聚闕下也今各差久缺至有一年以上者舊年已蒙准差旋復留住茲又三月有餘而尚未領勅辭朝遂使百事廢弛諸釁叢作伏乞早允御史孔貞一等領給勘合辭朝赴差以振綱維以肅政理謹擬諭帖上

諭都察院各差御史孔貞一等俱着給與勘合辭朝赴差去二明上

請通仕路揭帖

三臣題竊照臣等待罪輔弼股肱一體不得不
先天下之憂而憂若使憂已迫而後憂之嗟其
晚矣臣等正月間上祈天永命一疏所請雖多
而尤惓惓于惜才補官一節蓋其要也今考察
既畢而科道拾遺之本未發則汰黜之典未了
選用之事又妨大察之後天下司道官缺至七
十九員知府缺至七十五員各差御史不遣之
出巡而留之都門在都門則太有餘在四方則

太不足是使綱紀群有司者無人也則賢才何
由用官職何由修皆足以誤政事而召憂虞伏
望俯從部院之請二月二十日上

請給各差御史勘合揭帖

三臣題臣等蒙發各差御史余懋衡等請給勘
合本文書官口傳 聖諭問明了逆賊方許出
差臣等敢不遵奉擬票但臣等伏思逆賊一事
皇上屢發嚴旨中外臣工震恐悚息竭力盡心
既無毫髮不到矣然智者擬議謂奸人必已遠
逃前有旨着各省直通行廣捕並無踪跡亦可
以見各差久缺而法令之不行矣臣等伏思與
其聚諸臣于闕下而竟日無為不如分道四出

或得一效亦不可知臣等敢擬一旨上進伏
冀聖明裁定以昭責成之意

擬旨逆賊尚未問明各御史本不宜准差但今天
下法紀久廢專容奸縱惡釁孽不少着各振揚
風裁以圖報稱不許仍前怠恣廢事勘合准給
與仍勒限前去該部知道二月初三日上

東宮講讀請期揭帖

三臣題自春以來請 東宮講讀日期已經五
疏未奉 俞旨在廷諸臣習見舊例於正月中
開講獨今年最遲初向臣等問 東宮何時出
講臣等權以春寒為辭今已近夏廷臣又累向
臣等問 東宮何故久不出講臣等渙然無可
置對竊惟功夫戒於作輟典學貴有終始一年
之中除汎寒溽暑外光陰樂何豈宜久曠且無
以慰中外之懸望也臣等又擬得本月二十二

日二十六日皆吉伏皇即賜允發欽遵施行三

十九日上二
六日奉

聖旨朕因入春以來天氣寒暖未調且朕亦屢動火微感皇太子體質清弱少待融和耳覽卿等奏具悉忠愛皇太子著於本月二十八日照常講學該衙門知道

原缺

三臣題旨該文書官口傳 聖旨計內官王昇
清理牧馬草場勅書臣等具揭回奏文書官再
傳 聖旨這箇官兒不是徑差去的因撤放馬
匹去的帶管清查寫勅與他事完即回欽此竊
惟近年以來凡百利源盡籠于朝廷四海之內
無一寸安閒地方常恐民窮變起難以撲救惟
茲畿輔乃 祖宗陵寢所在 皇上社稷所在
尤當深慮尤當厚恤諺云蛟龍不擾穴畔人家

禽鳥不啄 窠下粟粒彼亦知愛護其隣以托其身也况輦轂之下三輔之中其宜愛護又當何如四方無事而三輔有驚固所深忌四方有事而三輔并起更何托身且國家與強虜止隔一墻正藉民心以為干城而胡可使之愁苦詛呪渙然離也偏之以恩澤比各慶加厚亦不為過何忍薄之臣等姑不暇遠舉即舊年西山有窯戶之變今年易州有礦徒之變不逞之端相繼橫發為民父母者安可魚肉之誠未見其為利

也此牧地者豈真有豪右隱占言何足信文王之圃為方百里者芻蕘者往焉雉兔者往焉與民同之故稱聖王何可鱗鱗而取哺百姓以從已欲乎據該科揭此場地租係戶部濟邊錢糧載在會計錄中額課之重同于夏稅秋糧不可復加若依奏官所言明是假以上供為名生端擾害耳臣等萬口苦口豈為一巴身名之計社稷安則福利無窮奚止如奏官所云區區銀兩哉惓惓忠愛竊謂此一清查可無行也

十一月三日

二

勅御馬監右監丞署典簿事王昇近該騰驤右衛
後所正千戶李英等奏稱順天府薊州等州縣牧
馬草場土地疆界廢弛乞奏內官管理清查起科
濟國今命爾前去會同該撫按屯田御史秉公會
查奏內事情果否虛實若真係牧馬草場新近開
墾未經報官起科地畝查勘明實定立疆界照則
徵糧以濟國用若有別情明白開釋會本奏請定
奪畿輔根本地方朕加意撫綏恐驚民心因爾撒

原缺

回原籍固安縣去訖且駙馬何官不奉明旨擅
自離任好生狂肆可惡着便差錦衣衛官趕伴
回來奏請定奪此乃伊父素欠教子之方教習
部官鮑應鰲訓示之禮安在姑都着革了職為
民當差卿等可傳示遵行欽此臣等前日蒙發
駙馬都尉楊春元擬票看得春元所奏多中蘊
之言不宜外揚以傷國體故請密行戒諭不必
發科傳部其時尚未知春元徑自回籍據東廠
事件遣錦衣衛官追伴回京奏請定奪正其父

師不教之罪加以擅離職任之愆嚴責以示法
追還以全恩慶置甚當臣等不勝欽服即傳該
科發錦衣衛遵行外臣等再思之朝廷之馭臣
下可以專用法而馭中尉則宜無用恩蓋義無
可絕則法難盡行情當曲體則事宜委悉若但
追之使還而不慶之得所可以結今日未可以
保來日也觀春元此舉棄富貴如敝屣迅軒冕
若桎梏矣能繫其身豈能拘其心乎夫親莫親
于伉儷而不免于反目之嫌積反目之爻至于

原缺

天變自効疏

奏為天譴甚嚴臣罪滋著懇乞 聖明亟賜罷免以清政幾以應異變事臣惟自頃年來災異屢告其大者如天鳴星流地震川竭水旱相仍盜賊時作河決中土漕梗不通人民死者枕藉于路而淮潁之間饑荒尤甚逋逃成叢嘯聚已形加以比來人心搖動好為誇張謠言煩興妖術四起察其感召之原皆由礦稅棍徒布滿天下寸寸而索日日而攘皮骨俱盡血肉狼藉而

朝廷之上章奏日壅省署皆虛善言無一上聞
善政無一下究有觸者長繫而不赦有逐者長
棄而不收人絕望于太平故天變人妖勃然亦
起二百年詠歌之民皆有僨然操戈伺隙而動
之心非細故也今尤異者日食一事按詩小雅
十月之交註云日食天變之大者也正陽之月
古尤忌之四月純陽十月純陰純陽而食陽弱
之甚也純陰而食陰壯之甚也于此二月尤大
忌也去年四月日食人心已甚驚訝何意今復

再食同月同日而連歲疊見臣不知靈臺作何占候但據詩書所稱必不可視為尋常災祲亦不可視為尋常日食矣夫變不虛生必有所應天譴甚嚴聖主當修德以回之雖減膳撤樂下詔罪已猶謂虛文安可置之罔聞必宜坐朝問道修政立事進賢退不肖與天下更始臣位先百僚不肖最甚居常無責難陳善之忠臨事鮮糾繆繩愆之益知而不言言而不盡無誠意之積以感動于前無法語之入以轉移于後遷

延歲時棲遲不去負君負學一至於此臣觀漢時有災異寇賊水旱之儆則策免三公誠謂三公居燮理之職陰陽不和本其罪戾非苛責也今臣無狀實冠諸臣亟明政刑是宜首及伏望大奮乾剛顯賜褫斥以為人臣不職之戒若猶曲加含貸姑令省圖雖包荒納污之至仁非禳災撥亂之要術是忽天戒而無自新之意容不肖而為泄泄之圖非臣自陳而望皇上之本意也臣無任伏藁待命之至

四月初五日奉上

聖旨卿為元輔夙殫謀猷時多匡弼日食之異責
在朕躬正望卿共修實政弘濟時艱以應上天仁
愛之意豈可引咎自責遽爾言歸宜即出贊襄用
佐朕之不逮慎勿再辭吏部知道

因傳免東宮講讀報入直揭帖

臣題比因日食示儆中外臣工咸殷閔時憂國之懷手指目視集于臣身臣實尸位素食無所建明茲而退休已難償責是以控疏自陳良非得已何意聖慈尚猶誤留方欲再陳以回天聰而俄聞直閣無人有妨圈倣皇上至停東宮講讀以待臣等之入臣一以感激一以惶懼天高地厚之中有不勝跼蹐之甚者尚敢瞬息苟安必謀私請乎因昨初五日廟享鴻臚寺不

接報單今日謹赴報名廷見謝恩入閣辦事外
謹敍悃款以聞

四月六日初上

原缺

催山陰王相公卹典揭帖

三臣題原任大學士王家屏自為修撰之時日侍講讀以至于推叅大政躋于首揆 皇上恩禮始終允其回籍調理昨舉大典特賜存問不惟本官感激卽臣等無不感激而誦 皇上體貌輔臣之厚不以去留異觀也今本官實志以沒不獲罄其餘忠而禮部率循舊章為之覆議卹典已經催請未奉 明俞臣等夙與同官今隨閣後典章所係國體所關思得票擬之詞祇

循往制原非踰越乞檢批發行庶輔弼近臣存
沒光彩家屏將永永御結而臣等亦頂踵同擔
矣謹具題

四月十六日上

不增皦生光罪名揭帖

三臣題今日蒙再發法司覆皦生光罪名本令
臣等改票照得本犯罪名該三法司堅執守法
臣等不過票擬豈可有所增加若有增加則皆
移罪臣等矣惟親賜乾斷臣下自服臣等畏慎
引辭誠不得已謹以原本封上

四月一上
二日上

妖書逆犯正法恭慰揭帖

三臣謹題今日逆犯斂生光特蒙宸斷顯即靈誅宗社之大計益安宮闈之和氣彌洽聖心之焦勞盡釋矣伏望懋迎天和調順玉體平情喜怒留神政幾仁覆多方義裁不順公黜陟以盡人才之用正紀綱以消釁孽之萌四月二十七日

上

原
缺

請允差遣御史揭帖

三臣題照得舊年十月間蒙差御史喬應甲為兩淮巡鹽湯兆京為宣大巡按康丕揚為遼東巡按沈裕為廣西巡按溫如璋為兩浙巡鹽李培為真定巡按金忠士為貴州巡按史學遷為陝西巡茶沈正隆為雲南巡按皆已領有印信計日辭朝適值妖書事發特留緝問諸臣奉命各出鹹念共振風稜今罪人正法國討章明亦既不負任委矣獄事已訖諸臣更無復事而

所受之差事久虛安敢寧處該都察院為之題
請揭帖到臣伏乞允發遣行

五月初一日上

催揀選急選本揭帖

三臣題臣等每出入長安門有揀選諸生數十人羅列哀告乃舉人張翼新等吏部揀選為同知等官四月十八日發閣擬票未下該吏部再催亦未下查得國家三年會試之後下第舉人有揀選之例係是舊規今未得旨諸生皆遠方孤寒之人守候多時盤費罄盡薪桂玉粒又查四月間吏部急選一本亦未蒙發俱眼前懸切急情乞命將此二本檢發或即將臣等揭帖

發部施行不勝瞻望

五月六日上

請點宣府巡撫并總督倉場揭帖

三臣題宣府巡撫病故已義勅印等件無人代管轉眼防秋一切調度將領分布兵馬稽查功罪讐服夷虜其誰任之舊年虜王率衆臨邊不得所欲而去今能保其不來乎該吏部兩次會推五員今該總督又來催請乞點用一員責令星夜赴任以圖安攘大計其總督倉場尚書謝杰亦病故多日目下糧運將至正當坐撥倉殿星火催攢時刻難稽并乞將所推點發俾令總

督管此皆軍國大事至緊至要臣等不任遑遑

五月初七日上

卷之三
三十五
四十七

差遣御史領勅揭帖

三臣題照廣西等處巡按等差缺官蒙差御史沈裕等去因妖書事發留住六箇月今罪獄已決臣等具揭上請都察院具本上請准各赴差臣等隨具勅稿蒙准寫進今日辭朝領勅沈裕等五員尚未給發不審 聖意所在臣等竊惟四方遼遠糲孽易生水旱盜賊時多倣報亟宜分遣出巡况前獄已決裕等各效微勞正宜激賞而復此淹留亦非鼓舞用人之道也惟乞早

賜名發

五月三日上

催三鎮巡撫及倉場揭帖

三臣題竊照巡撫一官各省直皆不可缺人而山西大同宣府三鎮尤為喫緊蓋三鎮與虜止隔一牆而宣府去京師一二日大同山西去京師三四日若有聲息朝發夕至去歲虜王率衆臨邊數月方退今宣府巡撫彭國光病故數月矣山西巡撫白希繡大同巡撫張悌以考察拾遺閉門候命半載矣一應軍務停閭庶各道無所統紀將領無所號令內地軍民恐生心

而狡虜聞之寧不飈起故人皆為此三鎮危之
三鎮危則京師不能頃刻安矣物故之人既難
歸咎聽處之人亦且有辭縱有新命不能朝受
餞而夕對壘至於總督倉場一官喫飯亦為最
甚夫倉糧者乃官府以至軍民胥待此以養贍
者也人不能一日缺食安可一日缺此官今奉
旨會推又奉旨再推豈無足以當上意者而又
未點用何也臣等已經數請允重深遠特未暇
置念耳乞立命吏部將前數本寫上旨發臣等

原缺

請陞選郎揭帖

題照得吏部文選司郎中舊規六選既畢即出衙門蓋此任怨任勞之地不可久居六選未畢而出嫌于速化固為不可六選已畢而留嫌于貪權尤為不可累朝斟酌定規六選則陞為太常少卿遵守為例今郎中景明已畢六選堂官循例擬陞太常少卿提督四夷館於例相應而本官清慎有聲未蒙俞命然本官已出衙門不敢復即以朝命留之彼亦安可復留哉乞

念典選實難已有成績者酬以一官使將來者
有所勸不可久稽以誤六月選事

五月上
九日上

原缺

祖陵雷火揭帖

題文書官毋登捧出 聖諭朕見連日時序寒
燠不調正慎靜攝之際今日覽文書見天壽山
守備內官李浚等具奏本月二十三日夜雨雷
火燒燬 祖陵明樓朕心驚懼弗已其恭行奉
慰修理及修省禮儀卿等便擬出旨來諭御等
知欽此臣等昨日出閣已聞傳言耳不忍聽心
不忍信今奉 明諭戰慄憂懼天威屢嚴而孔
赫 祖靈甚愾而靡寧愈昭愈大愈迫愈近誠

宜哀痛責躬側身修行以為臣下率先臣等舉
宜洗心滌慮犯顏苦口必修實政無務虛文庶
可少回上天之怒而奉妥聖祖之靈若猶泄
泄因循悠悠虛度恐几席之間旦晚之際又有
甚于此者謹欽遵擬票上進外敢以緊要一言
陳之蓋近來章奏不通德意不宣人心鬱憤已
到極處天地祖宗日陟降于上下幽明之壤于
何不知福及蘊隆無所發怒故特再昭儆戒耳
欲修實政必自通章奏始欲通章奏必自撤疑

情始君開誠以任下臣披誠以事上上下之間
渙然不疑有疑即詢有謀必用有事即斷有斷
即行則奸弊何所容隱釁孽何所藏蓄群策自
然畢舉群情自然舒暢和氣充于宇宙而宵旰
何勞獨憂所以仰答天地祖宗而貽國家千萬
年之祐者端在于此若但有畏天敬祖之言而
無其事則人尚難欺天豈容僞飾貌辭詐能
感移祗增矯誣以速譴罰耳臣等陳言至此毛
骨皆悚皇上但疏通章奏俯採群言申冤理

滯進賢達能則人心悅而天意得轉災為祥化
憂為歡皆不難矣臣等無任涕泣懇祈之至十三
二年五月二十
十五日上

發天下補官本揭帖

題臣等竊惟治天下當先防其患而防患之術
當先圖于早今年大察之後天下官員多缺布
按二司及各知府運使運同苑卿共缺至一百
七十一員從來官府之空未有如此之甚者司
道有缺各道帶管帶管者或遙制千里或兼攝
數道事多漏遺其職溺而不舉知府有缺佐貳
官署管而佐貳官率多舉貢監生出身日暮途
窮官卑望渺民生日感盜賊多起故今年福建

有白蓮社之盜廣東有珠池之盜雲南有嶍峨
之盜皆由地方無官所致也又南來者言河南
歸德一帶歲歉民饑死者枕藉相望餓莩之在
途者人尚未死率鬻而食之本省巡撫久缺巡
按又病誰為撫治誰為彈壓江北四道四府而
缺官者五關係祖陵運道又值水災荒歉盜
賊樂于無官而良民苦于無主即此一處他處
可知臣等聞此為之骨寒毛悚哀痛而不能安
也謹查天下方面官員缺數恭進御覽伏望

惻隱保民憂危保國將吏部推補本章不時允
發幸甚其各處知府吏部曾有總推一本在御
前若即賜檢發尤幸五月二十日上

請發御前章奏揭帖

三臣題臣等待罪內閣以輔養君德出入綸命
為職者也頃來御前本章發票者既少及至票
擬批行者又少所行不過令部院知道者耳部
院之題覆不下則與不知道何異若其是也當
亟從之如其非也當令再議不宜久留而不斷
也竊見皇上優禮二三老臣意亦專篤但任
其人而不行其言其人雖在而無能展其尺寸
欲責之以消戢災變鎮安夷夏得乎精神不流

貫于上下法令不綱紀于域中而求敉寧之效
此必不可得之事也長陵之變異極大聖
心之警惕甚深顧警惕而以政事行之方是真
警惕真與不真在政事之行與不行尚有遲滯
則昭昭上天赫赫祖靈必將更加厭數而若
臣若民若夷夏盜賊皆將乘天地祖宗之厭數
而生他心至是則雖有二三老臣無益于毫釐
輕重矣臣等連日上揭望皇上省發章奏今
日奉有一二之發心亦稍慰但未發者多如皮

林之功雖敘而播州大功尚阻武官之推有點
而文官之推崇格其他遺闕舉朝苦口而未見
一新中心如焚竊謂如此大變決非一二小事
可以塞責當以實心實政應之乞將 御前積
下文書凡已票該發者通行批發凡已覽未票
者通行發票此乃收人心回天變第一實事臣
等不勝跂望五明二十

辭楚黔皮林加恩疏

奏為隆恩誤被揣分多慙俯容辭免以逭譴戾
事昨吏部接出 勅諭勅吏部楚黔皮林惡苗
作亂將士宣威剿除朕心嘉悅內閣輔臣密勿
決策忠勲茂著宜特加恩元輔沈一貫加少師
兼太子太傅廩一子與做中書舍人還賞銀五
十兩綵段四表裡次輔沈鯉加太子太保朱賡
太子少保各廩一子入監讀書還各賞銀四十
兩綵段三表裡各餘官如故俱照新銜給與應

得誥命如勑奉行欽此備行到閣不勝悚惕不
勝兢惶竊惟朝廷馭世之權惟爵賞最重臣子
律身之法惟辭受最嚴無功之賞是曰濫恩非
義也臣等緣遭逢之幸荷特達之知備位卑司
享有崇職而容容度日建豎靡聞下無濟于時
艱上無裨於袞職至於皮林之捷督撫運其機
宜將士奮其拳勇恭行天伐成此武功臣等何
力焉忝居密勿未展一籌進止不聞謨謀莫與
所決何策所著何勲武臣立功於外而臣等坐

原
缺

再辭皮林敘并推敘播功疏

奏為懇辭誤恩并陳票擬始末乞下播敘以解人疑情慰人渴望事頃蒙行皮林之賞推念閣臣賜之誤恩臣等既以合疏懇辭未蒙諒允第臣等三人各有委曲之欲伸也謹以獨疏言之蓋閣臣不預軍賞臣謹守此約身無橫草而操文墨議論以分其賜不義也抑治世以文不以武安民以善不以殺臣從政多年無一善狀而區區惟武功之聞以涉血履腸為彝常事豈不

上違天心而下羞當世哉况今天變示儆士大夫憂惶縱十命之必十辭之有不容不瀆者夫皮林之功與播州之功雖異地而其時其人彼此相因不可分而為二故今年正月兵部以兩本同時敘上而臣之擬票因亦通融于兩本之間皮林本中柄其事而功最大者巡撫江鐸總兵陳璘也二人之功于播尤著故并敘于播而于此本中但敘其次若戴燿李如樟等今皮林之敘下而播敘未下見者不察必疑以為遺鐸

而敘耀遺璘而敘如樟舛錯不倫晦臣本心臣
豈能須臾苟安哉論功則皮林小而播州大論
時則皮林後而播州先兩功之成三年而始敘
然猶一行一留何以慰忠勞之心為後來之勸
臣是以日夜踴躍望稍輟萬幾將兵部敘播功
本即賜檢發行臣之言愈于榮臣之身有功者
庶無遺漏無功者庶無冒叨數年稽閼一旦注
銷免臣尤戾恩光孰大于是臣一辭一請旨出

懇迫伏冀

矜允

六月初奉

聖旨皮林之捷卿實居中運籌加恩非過既懇懇
固辭特允所請以成卿勞謙之美播州敘功疏朕
因細覽尚留旦夕即當檢發并諭卿知吏部知道

催二省按差揭帖

三臣題今日臣等得都御史溫純揭帖謂浙江廣東二省巡按御史報滿已久曾擬御史王業弘往浙江葉永盛往廣東接管巡按候 命未下具題再請臣等照得二省皆東南奧區邊海要地今倭奴出沒波濤狠心叵測所賴鼓舞將卒甄別功罪者惟按臣肅紀執法之力關係不小伏望軫念早允前題刻期交代目前一急務

也六月初三日上

回 聖諭揭帖

三臣題文書官劉用捧出 聖諭諭內閣 祖
陵變異朕心驚懼戰慄連日調攝尚未行切要
實政仰副仁愛之心思得天下廣大設官分職
慎重用賢圖治國家第一要務方今南北兩京
大僚司屬并各處撫按及各省直方面官員見
缺數多亟宜銓補庶安民生其三法司并錦衣
衛見監罪囚除重罪及欽定人犯外有情可矜
疑牽連無辜者宜當欽恤用示好生卿等傳示

便着各衙門從公推舉各堪任的及逐一開寫
所犯招由通行具奏以昭朕畏天敬祖警惕至
誠特諭卿等知之欽此臣等捧讀再三不覺舉
手加額而慶 聖德之增美 聖政之更新也
從此而日新又新廣運于不已如天如地覆載
于無窮則頌 天子萬年者踵武相繼而至矣
何災之不轉為祥哉蓋昔人有言求福者善言
不可離于口竊為今日願之謹即傳發部科遵
行外所奉原諭尊歲閏中回奉以聞

六月初七日上

回 聖諭揭帖

三臣題該文書官盧受恭捧 聖諭到閣諭內
閣朕覽卿等昨奏揭帖具悉忠愛懇切至意但
朕自聞 祖陵災異以來至今尚然驚懼調攝
未得安寧以致虛軟兼且足疾偶發艱于步履
御朝不便面見恐失禮儀卿等屢奏應行時政
少俟檢發其召見至誠候旨從容行之所請詣
門起居已知道了諭卿等知欽此竊惟臣等忝
為股肱密勿之臣義則君臣恩猶父子日祝

聖躬康泰聖心豫悅享有萬壽萬福之全而今
臣等亦預隆天厚地之賜此至願也夫何天心
不順災變頻仍累及 祖陵哀痛慘極今小民
之家亦以墳墓風木為重而况帝王天系始發
禎祥之地可令少有傷動乎是以 聖心靡寧
臣等益甚恭請面對以申奉慰之忱而求交修
之策丹誠激發良非獲已茲承 諭旨敢不欽
遵恭惟 皇上平日起居常有待于調攝方茲
驚懼固宜萬分保重然天心無他出于仁愛而

己惟善體天心力行仁政則皇穹必將轉怒而
為善 祖陵亦將轉危而為安 聖心與天心
合而氣和形和兩間之和咸應之如此則 聖
政既善聖德既新而聖心亦愉聖壽益永神祇
宗社降福穰穰其為利益豈不無得蓋人心一
念正則事皆出于正一念邪則事皆出于邪出
于邪則怪徵妖應物象神符從而並集出于正
則乾靈坤珍祥輝瑞祉亦從而並集此理自然
古今不爽康誥曰惟命不于常道善則得之不

善則失之幾希之間正在今日 聖諭云不便
面見恐失禮儀臣等不敢復請 聖諭云應行
時政少俟檢發臣等實切拱候今缺政甚多各
衙門亦能修補惟隨題隨發堅持此心無煩于
查檢無待于少俟也所念從容召見乃唐虞明
良之風臣等未遂躬逢不勝引領其詣仁德門
起居臣等敬遵 恩旨明早恭趨行禮少展瞻

依之忠

六月十
二日上

弭灾實政揭帖

三臣題竊惟 祖陵雷火下擊頃復覩亟傷之
炎似此大變非常天地祖宗之心已可知而群
方萬姓之心又可知數日以來凡懷忠愛者熱
中如火而章疏猶多未下實政猶多未舉殊覺
聖心冷淡豈謂一青衣角帶便稱修省乎豈謂
一仁德門起居便稱納約乎又豈謂修齋建醮
可以識悔乎夫怨詛遍于四海而托祈禱于數
巫其何能勝祈禱而有益則閭閻山澤失業被

害之人與士大夫之竄棄羈囚者曷嘗一日不
祈禱而皇上未之聞也皇上如聞之則上
天亦聞之矣臣等比來屢揭盈五六千言而無
一言足以感動聖心實自傷其誠意之未積
然比來章奏非無省發而人情之所急望殊多
留格亦何以感動天人之心而安聖祖地下
之靈哉宮禁之中鎖鑰巡警最為嚴密未嘗頃
刻缺人防不虞也今日朝堂而外人率異心假
令一旦突生不虞之事能獨守宮禁以為安乎

凡此部院百官皆掌京師之鎖鑰而時加巡警者如之何可不備也又自三輔而外人尤異心假令一旦突生不虞之事能獨守京城以為安乎凡此撫按以至于郡有司掌群國之鎖鑰而時加巡警者如之何可不備也人必有心膂耳目手足而後可以為人一有不備非人矣今夫部院皇上之心膂也科道皇上之耳目也撫按群有司皇上之手足也然而不備其可以為國乎一體不備則無論虎豹蛇虺雖一飛

畜得苦我矣一官不備則無論夷狄盜賊雖一
白梃得侮我矣此易見之理也竊惟皇上之
心豈不儆惕聞宮中日夕焚香祈天永命顧祈
天永命要在修政立事而不在焚香致禱世人
有所祈求而或制于人或制于天力不能自得
則無可奈何而出于焚香致禱之計皇上則
不然凡所祈求者非制于人非制于天皆力可
以自得而自不為誠奮然有為則言朕于口而
仁流于天下詔罷礦稅即礦稅罷詔出囚繫即

囚繫出詔起廢棄即廢棄起萬邦黎獻歡謡在
茲矣今日之事乃天地求回 皇上之心而不
可得非 皇上求回天地之心而不可得也乃
天地不能奈 皇上何非 皇上不能奈天地
何也天地 祖宗降鑒孔赫何煩焚香祈禱哉
皇上一撤疑心而示人以信一撤已心而示人
以公將近日吏部等衙門所推部院大臣及各
撫按司道等官與一切推選本章早賜 先發
分遣御史巡行天下停不急之工罷無藝之征

出久繫之囚收廢棄之士信能行此數者為堯
舜何難之有 皇上以其至誠而祈之于天臣
等以為遠臣等以其至誠而祈之于 皇上臣
等以為近望 皇上一俯納焉 聖心回即天
心回矣臣等憂懼迫于中危亂迫于外有日進
一牘耳若坐視以負恩眷之厚實所不敢實所
不忍無任戰慄之至

六月上

選館揭帖

三臣題臣等于十四日恭奉 欽命會同吏禮
二部及翰林院掌印官考選庶吉士十五日公
同校閱取正卷二十三卷并副卷八卷具揭上
進連日拱候未蒙覽發竊思各進士既在闕下
候旨不敢赴部聽選亦妨觀政辦事乞早將
正卷裁定發行作養教習實為恩便六月二十
一日上

回 聖諭揭帖

三臣題昨日欽奉 御札諭內閣朕自 祖陵
災變驚懼氣痛調攝未寧近因連日暑雨濕蒸
足疾未愈步履甚艱昨又聞 天壽山松樹生
虫多食其葉朕五內如灼心神恍惚益覺頭眩
身體虛軟所有修省實政少俟次第發行朕思
祖陵工程隆重恐該部措辦錢糧不敷致悞工
作所有御前累年積省銀二萬兩另有諭發該
部擇日興工上緊修理刻期報完卿等為朕輔

弼股肱宜仰體朕朝夕匪懈畏天敬祖不敢自逸至意特諭卿等知之欽此仰惟皇上因祖陵大變而震動于心急圖工作首發內帑念修省之實政而許以次第舉行戒股肱之惰窳而責以仰體匪懈此固天之漸也竊思陵工重大必非二萬之費所能了然皇上二萬當得工部四萬蓋聖意所注內外儆惕無敢侵漁無敢需索皆得實用自省虛費此亦修省實政之一端也但今日祖宗之所望于

皇上者豈止工作而已哉 聖心自明不待多
說真以實政為急必當仰法 聖祖每夜思四
方之政五鼓而興待旦而行如坐針氈如寢火
薪何能頃刻遲後而猶曰少俟不幾又成虛套
乎一日亦俟一月亦俟俟之為言有何底極臣
等請 皇上亟行此心更勿遲延臣等非不欲
俟而天下危亂在即度日如年真有不能俟者
故遑遑也乘天下未變而圖之則權在 皇上
但一下 明旨而海宇大定待天下有變而圖

之則權在匹夫一經嘯聚便難措手在天聖靈
早已先見念之念之 聖諭謂五內如灼心神
恍惚此真實語臣等皆信幽明一理 祖孫一
氣固宜有此然當思 列聖神靈之心恍惚又
當何如焦灼又當何如也 聖諭責臣等仰體
淵衷朝夕匪懈敢不刻骨銘肌奉以周旋但臣
等密勿近僚不能自用一人自行一事第有集
合衆思入告于內當行者請行當止者請止懷
此苦心竭此敝舌而已 皇上若不虛中采納

臣等雖有匪懈愚忱亦何所少概見哉茲敢奉
聖諭次第舉行一語以為左券跂俟德音願
皇上旦晚之間不負此一諭也不勝戰惕之至

六月二十
二日上

催補官揭帖

三臣題臣等前者懇勸 皇上將內外缺官點
補實救時急務方今各處討官之本無日無之
而不之補發萬一有事人皆得以推餚已罪歸
過朝廷惟各有官守則何推諉之有臣等前查
天下司道知府缺至一百七十一員近雖有補
尚未十一乞隨題隨用其山西河南鄖陽福建
四處巡撫尤為緊要所推皆可用之人乞檢查
點用至于四月急選揀選二本尚在 御前此

項小官守候日久每向臣等悲號乞告所不忍
聞并祈早發

六月二十
五日上

再催二省按差揭帖

三臣題浙江廣東二省巡按御史滿日已久都察院擬御史王業弘往浙江葉永盛往廣東各接管巡按臣等前曾揭請昨該院復有催本竊惟二省邊海地方防倭重寄內地奸人素多通畨接濟而各將官軍士亦有弊竇百端所賴肅紀振綱實巡按之責伏乞允其所請六月二十五日

上

再催揀選急選本揭帖

三臣題臣等每出入長安門輒有京外臣民求訴百端痾瘼切心不得不奏他未暇論第如揀選急選二項官員慰之不能去麾之又復來彼守候太史桂薪玉粒借貸無所僕逃人散諸苦所迫言不能既今日各揀選諸生又來投揭謹封進御前惟賜一覽昔唐時楊敬業作亂武后得其檄文而讀之間誰所作或對曰駱賓王武后曰有才如此而不收用宰相之過也蓋才智

之士收之則為朝廷棟梁棄之即為草澤嚆矢
天下沟泡而不廣收賢才為朝廷用倘致後悔
臣等安辭其過所以屢勸補官正為此耳亦不
獨揀選一事也無任哀懇之至六月二十一日

四 聖諭揭帖

三臣題該文書官盧受捧出 聖諭諭內閣朕
以 祖陵災變兢惕修省未已 正在服藥調攝
昨又有 天壽山守備內官李浚具奏 各陵
近因雨水連綿衝毀神路橋梁樹株等項朕心
愈加驚痛不寧且連日暑雨濕蒸足疾腫痛屢
用藥水盪洗步履甚難今 廟享在即慮恐弗
能成禮暫行遣官恭代及各執事務秉精誠竭
虔行禮以稱朕孝敬至意卿等傳示奉行諭卿

等知欽此仰惟 皇上每當 廟享之時必有
特諭之發雖孝思之誠多鬱于攝養而敬畏之
意猶見乎言詞恭代竭誠臣子之分欽遵傳示
其敢有違但今日之事與前有異 天地祖宗
之所以示儆 皇上者日新而 皇上之所以
仰答 天地祖宗者如舊以調攝而廢禮猶可
詞也 以利欲而廢政不可詞也 虛言何以表兢
惕之懷彌文何以覩感通之效曾不如數行
詔墨大敷德意與天下更始使萬姓復蘇則

天地所生之民安而祖宗亦安祖宗所養
之民安而皇上亦安是天下臣民之所翹首
社稷神靈之所注目者也額割已私早沛恩

命

六月三上